

Leeter masa Pawl ma wuzlalara **a** **Filemanjw** **Mey da ray leeter ngada** **Filemanjw**

Pawl a wuzlalara leeter kede a Filemanjw na, daa masa anga fa wuzlalatar a ndohay Kwalaws hay. (Kwa 4.10-17; Flm 23-24.) A wuzlala leeter e, daa masa anga daa fərsəne. Ndohay a wulkam leeter e na, ara Tisik ma handara a Filemanjw cewete ta leeter ngada Kwalaws hay (Kwa 4.7-9).

Filemanjw na, ara jam nga Pawl, a njeɣ daa berney nga Kwalaws. Pawl a wuzar Mey-maaya-mawiya, ta', a təba, a terey ndaw nga Yesu (aya 2). Anga na, ara ndaw masa-zleley, beke anga hay daha. Beke anga pal daha mezəley Awnezim. Ta hway la da way bay anga ha. A hətfar Pawl daa fərsəne, ta', a təba meɣ nga Yesu, a terey ndaw nga Yesu may (aya 10). Fa dəba ha, Pawl a slərdərwa Awnezim e fa bay anga ta leeter e kede. Daa mewey nga Rawma hay, beke masa ma hway sem na, bay anga a gwa a kəda vagay. Ara maja ngene, Pawl a wuzlalara leeter kede a jam anga Filemanjw amba aa cəfda nga sərfar dey-ceceh a Awnezim, a təba anda məlmanj daa meɣ nga Yesu (aya 16).

Mecey-har

¹ Ara yah Pawl, ndaw daa fərsəne maja sləra nga *Yesu *Kəriste ma wuzlalakawa leeter kedfe, ala ta məlma aləkwa Timawte.

Ya wuzlalamakawa ngada kah, Filemanjw, jam ala masa aləkwa ma kakwa sləra nga *Gazlavay bama.

² Asaya, ya wuzlalamatara ngada dam-mama aləkwa Apiya, lenj ngada Arkip, ndaw masa ma jənnəkwə daa cəved nga Yesu anda ndaw ma jəney ndaw daa vəram. Ya wuzlalamatara ngada ndəhay nga Yesu ma kusam da way akah may.

³ Anja Papa aləkwa, Bay Gazlavay, ta Bay aləkwa Mahura Yesu Kəriste nga pəsməkwə me, asaya, nga njadaməkwə daa zazay.

Pawl a key suse a Gazlavay maja Filemanjw

⁴ Mandaw mandaw masa ya fa dərey dāngay a Gazlavay na, ya fa sərfadaka, Filemanjw. Ya fa kar suse maja kah,

⁵ maja ya cənda kah fa wudta ndəhay nga Gazlavay tabiya, ka fa pa Bay Mahura Yesu nga ndaw akah fara fara.

⁶ Da masa ya fa dərey dāngay na, ya faa cəfda Gazlavay nga jənnəkwə nga sərey mepəsey-mey anga tabiya masa aləkwa ma hətkwa ta fa *Kəriste maja aləkwa macəmkaya, aləkwa fa pakwa Yesu nga ndaw aləkwa fara fara.

⁷ Məlma adaw, mewudəy-vaw akah taa səmdaya la, ta vəlya gədanj la kwa ara me

ba, maja kah ma dëktar mevel a ndëhay nga Gazlavay.

Pawl fa kar ambahw a Filemanjw maja Awnezim

⁸ Yaw, yaa cëfdaka nga key cek masa yah ma da lëvka kede maja ka wudta ndëhay nga Yesu. Yah tëde nga tëkaka dëy nga ka cek aha maja yah na, *ndaw-meslërey nga *Këriste.

⁹ Ama ya tëkaka dëy ba. Maja ya wudka kalah, maaya na, yaa cëfdaka taa cëfdëy. Ara yah, Pawl, ndaw-maraw masa majëwkaya daa fërsëne maja yah ma wuzey mey nga Yesu Këriste, maa cëfdaka,

¹⁰ ya fa kaka ambahw maja Awnezim. Anga ta tërey sem anda bëzey adaw daa fërsëne kede, maja ara yah ma ka amba a tëba mey nga Gazlavay.

¹¹ Zleezle na, Awnezim e ta jënka daa ba, ama wure kede na, a jënka la anda aa ma jënya.

¹² Wure kede ya fa slërdakawa, anja masa anda mevel adaw.

¹³ Yah daa fërsëne maja yah ma wuzda *Mey-maaya-mawiya. Ya wudëy na, anja a njey da cakay adaw mandaw mandaw daa masa yah daa fërsëne kede amba a jënya aa slam a nga akah.

¹⁴ Ama ya wudëy nga ndëvda mey da ray Awnezim e yah taava adaw ba, si kah ma tëba mewulkey adaw da ray a la dëgay. Nga key cek maaya na, ya wudëy nga tëkaka dëy ta tëkey ba,

1:7 7 Rm 12.10; 2Kwr 7.4; Heb 13.1 **1:8 8-20** 1Tm 6.1-2 **1:9**
9 aya 1; Ef 3.1 **1:10 10** Awnezim: Kwa 4.9; **bëzey:** 1Tm 1.2
1:13 13 Fël 2.30

ama si ka key cek masa maaya anda mevel akah ma wudey.

¹⁵ Da Awnezim e ta mbəkɗaka sem nga ɗar nekəɗey, amba fa ɗəba ha a vəhey, ka njam nga tar kwa.

¹⁶ Kwa anga beke akah na, wure kede anga beke daada saba, maja anga məlma aləkwa mawudkaya kalah daa mey nga Yesu. Yah na, ya wuɗa kalah, ama ya səra ka da wuɗa ma fənya. Ka da wuɗa maja anga beke akah, asaya, ka da wuɗa maja anga məlmakw daa mey nga Bay Mahura Yesu.

¹⁷ Anda kede, da ka fa paya nga mandala akah daa sləra nga Yesu na, təba Awnezim e anda kah ma təɓya.

¹⁸ Da ta kaka cek maaya ba la, da ta zəmka dəvaz akah la na, ŋgene, mey a tabiya a ray aɗaw.

¹⁹ Ehe, ya wuzlalakawa mey kede ta har aɗaw, *yah Pawl ma da pəlɓawa*. Kah may, dəvaz aɗaw da ray akah daha. Ara yah ma ka amba ka təba mey nga Yesu nga hətey heter mendəvey ba na, ka sərɓada saba daw?

²⁰ Ambahw məlma aɗaw, kayawa cek kede maja mewudey-vaw nga Bay Mahura Yesu. Dəkyə mevel maja aləkwa macəmɓaya ta Kəriste.

²¹ Daa masa ya fa wuzlalakawa leeter kaa na, ya səra fara fara ka pey sləmay la fa mey aɗaw, ka da ka anda yah ma wudey. Ya səra cek masa

kah ma da ka na, a fəna cek masa yah maa cəfdaka nga key.

²² Ya fa wudɛy ngaa cəfdaka cek pal saya, dɛiyaya slam nga ney da way akah, maja ya wulkey Gazlavay a cənda medərey-dangay akwar la, a vəhdaya la fa akwar saya.

Mecey-har nga madagway-dakw

²³ Epafəras masa ala daa fərsəne cew e maja Yesu *Kəriste, a cakwar har ha.

²⁴ Yaw, *Mark, Aristarke, Demas, leɲ *Luk, ndəhay masa ala ma kam sləra nga Gazlavay bama, a camakwar har may.

²⁵ Anja maaya nga Bay Mahura Yesu Kəriste nga njey ta akwar.

1:23 23 Epafəras: Kwa 4.12 **1:24 24** Mark: SNM 12.12; 2Tm 4.11; **Aristarke:** Kwa 4.10; **Demas leɲ Luk:** Kwa 4.14 **1:25 25** Gal 6.18

Mofu-Gudur
The New Testament in the Mofu-Gudur language of
Cameroon: Mejəwey-mey Mawiya
Le Nouveau Testament en langue Mofu-Gudur
(Cameroun)

copyright © 2007 Wycliffe Bible Translators, Inc.

Language: Mofu-Gudur

Contributor: Aramaic Bible Translation, Inc.

All rights reserved.

2025-05-14

PDF generated using Haiola and XeLaTeX on 13 Dec 2025 from source
files dated 14 May 2025

2b021919-36cf-59da-a35f-10c5e5548811